

ZAPOSLNIK DRŽAVNE FIRME OTKRIVA KUPOVINU GLASOVA, KAKO SU DOBIJALI POPUNJENE GLASAČKE LISTIĆE I MOBING NA POSLU

Rani dani: direktor firme se kandiduje na izborima

Uoči Lokalnih izbora 2020. godine, uposlenik (68 godina) koji je radio u državnoj firmi više od dvije decenije i njegov sin, zaposlen u istoj firmi, našli su se u situaciji da ih se primorava da glasaju onako kako ne žele. Situacija na samom početku godine nije bila toliko alarmantna, tada je direktor firme najavio da će biti kandidat za načelnika. Isprva je davao bonuse radnicima, što nikada ranije nije bio slučaj. Tada se već vidjelo da pokušava na taj način pridobiti glasove za sebe. Međutim, uskoro se atmosfera potpuno mijenja na gore.

100 KM uposlenicima firme za glas na izborima

Kada je počela izborna kampanja, direktor je pojačao pritisak da se glasa za njega. Započeo je zloupotrebljavati radne sastanke u firmi, a vrlo brzo je krenuo i u otvorenu kupovinu glasova. Poruka je bila jasna: glasajte za njega, a za svaki glas dobijajte 100 KM. Dodatno je obećan i veći iznos, ako i članovi porodice uposlenika glasaju za njega. Podijeljeni novac, nije bio iz lične kase, već iz državne.

Uposlenici dobijali unaprijed popunjen glasački listić

Glasovi su se kupovali tako da svako ko je želio da glasa za

direktora već je unaprijed dobivao popunjen glasački listić koji je morao da ubaci u glasačku kutiju i pošalje SMS da je ispunio zadatak. Na taj način, direktor bi unaprijed znao koliko je gdje osvojio glasova.

Posljedice za one koji ne glasaju: duple smjene, stalni rad na terenu, smanjenje plate i otkazi

Zaposlenik navodi da svi koji su odlučili da ne žele učestvovati u izbornoj prevari, uključujući njega i njegovog sina, bili su izloženi zlostavljanju na poslu. Radili su duple smjene, stalno su bili na terenu i uplaćivano im je pola plate. Pred kraj, direktor im je tada zaprijetio da ukoliko na izborni dan ne budu glasali i ne uzmu popunjen glasački listić da će snositi posljedice, a neki čak dobiti i otkaz. Bez obzira na prijetnje, obojica su ostali ustrajni u svojoj odluci.

Moralna pobjeda uz ogorčenost u sistem

Nakon izbora i nakon što direktor nije pobijedio za mjesto načelnika, veliki broj osoba je dobio otkaz, a još veći broj je poslan na disciplinsku komisiju zbog navodnog nerada. Nažalost, zaposlenikov (68 godina) sin je također bio među onima koji su dobili otkaz. Zbog svega, i sam je dao otkaz i slučaj prijavio policiji. Prijavio je i kupovinu glasova i mobing na radnom mjestu, ali je slučaj zataškan zbog veza direktora u policiji. Navode kako su ostali ogorčeni na čitav sistem i društvo.